

20. december 2016

Inatsisartut suleriaasianni § 37 naapertorlugu matumuuna imaattunik apeqquteqaatinik Naalak-kersuisunut saqqummiussivunga:

**Apeqquit:**

1. Tasiilap nunaqarfiini nioqqutissat akisunerujussuat pillugit Naalakkersuisut arlaatigut iliuuseqarnissamik suliniuteqanngillat?
2. Igaassat niivertarfinni akit qaffasissorujussuupput, illoqarfimmut sanilliullugit akisunerujussuupput, sooq nikingassut taamak annertutigisinnaava? Assersuutigalugu puulukit pamiuilluunniit nunaqarfinni akisunerujussuupput, tamanna sumik tunngaveqarpa?
3. Tunumiit Islandimut nioqqutissanik niiveqateqarsinnaaneq Naalakkersuisut qaqugu pilersinniarpaat? Periarfissaq tamanna siornatigut eqqarsaatersuutigineqartareernikuuvoq, sumut killippa? Qanorlu ingerlava?

(Inatsisartuni ilaasortaq Laura Táunâjik, Siumut)

**Tungavilersuut:**

Qanittumi radiokkut eqqaaneqarpoq tunu avanersuarlu aningaasaqassutsikkut annikinnerpaanik isertitaqarfiusut. Akerlianilli nioqqutissat kitaanut sanilliullugit tunumi akisunerungaatsiarput. Suliffissaaleqineq piuvoq, ammit akiinik pingaartumik massakut piniartut aningaasarsiorniarsaripput. Inuussutissarsiorneq ilungersunareersoq niuertarfinni nerisassanik akissaqarniarneq inorsarfiuvoq.

Paaserusunnarpoq Naalakkersuisut qanoq pitsanngorsaataasinnaasumik suliniummik ingerlatsiniarnersut. Taassuma saniatigut Islandmut nioqqutissanik niiveqateqarsinnaaneq qanoq pilersaarusiorniarneraat paaserusunnarpoq.

Kissaatigaara apeqqutima ullut suliffiusut iluanni akineqarnissaat.